

kedutaan Arabiyyah Sa'udiyah. Berdasarkan ini maka bolehlah ditafsirkan bahawa kedutaan (Diplomat) kerajaan 'Arabiyyah Sa'udiyah, kalau hadiah itu daripada hadiah kerajaan tentulah melanggar peraturan protokol kalau ia sendiri menyampaikan wang sebanyak itu terus kepada suatu badan yang dikehendaki. Kita berharap Kementerian Luar Negeri Malaysia memerhatikan persoalan ini dengan berat - sekiranya hadiah itu hadiah daripada kerajaan.

Yang demikian bersalahan sekiranya hadiah itu daripada perseorangan ataupun daripada badan seperti umpamanya daripada *Rabitah al-Ālam al-Islāmī*. Ini pun hadiah itu tidak boleh menerusi sesuatu kedutaan tetapi hendaklah ada hubungannya terus daripada badan-badan atau orang-orang itu sendiri daripada pertubuhan yang berkenaan.

Kita jelaskan perkara ini di sini sampai niat baik yang tulus ikhlas daripada kerajaan Sa'udiyah dalam menyampaikan jihadnya membantu saudara-saudaranya umat Islam di seluruh dunia biarlah berjalan dengan lancar - tidak dengan sebarang yang boleh menimbulkan kesan-kesan yang tidak baik di antara kerajaan dengan kerajaan yang di dalamnya sememangnya banyak golongan-golongan yang anti agama yang tidak berkenan ada bantuan dari luar terhadap umat Islam dan badan-badan Islam di tanah air kita ini.

* * *

Awasan Dakyah dan Putar Belit

Selalu benar temuramah dibuat oleh Lee Kuan Yew, Perdana Menteri Singapura dengan pemberita-pemberita akhbar sama ada wakil-wakil akhbar tempatan atau pun luar negeri. Temuramah-temuramah itu disiarkan beberapa kali di dalam radio dan televisyen. Selalu pula kita melihat bagaimana Lee Kuan Yew berbelit-belit menjawab sesuatu soalan yang disoalkan dan bagaimana pula ia menafikan apa yang

dikatakan lebih dahulu terutamanya dalam perkara-perkara yang menggepalkan umum dan menaikkan kemarahan mereka itu.

Ringkasnya temuramah yang dibuat oleh wartawan-wartawan khususnya kepada Lee Kuan Yew itu adalah selain daripada menjadi dakyah kepadanya dan kepada partinya, juga menjadi tempat ia menafikan segala sesuatu yang sudah diucapkannya dengan putar belitnya daripada keadaan yang sebenarnya.

Dengan hal yang demikian ini patutlah rasanya bagi kita terutamanya wartawan-wartawan Melayu memboikot daripada mahu bertemuramah dengannya kerana walau apa pun coraknya temuramah itu tidak ada ertinya untuk faedah kita selain daripada meluas daripada melebarkan dakyah-dakyah Lee Kuan Yew dengan PETIRnya dan menambahkan faedah-faedah untuk mereka.

Selain daripada itu umat Melayu sudahlah tiba masanya menutup mata dan memekakkan telinga iaitu kalau ada suara Lee Kuan Yew yang berulang-ulang di televisyen dan radio, lebih baik tutup sahaja radio atau televisyen itu kerana tidak ada faedahnya selain daripada mendengar putar belit atau lidah bercabang daripada mereka itu. Ini yang sebaik-baiknya untuk menjauhkan kita daripada pengaruh-pengaruh busuk dan putar belit daripada suatu parti yang cuba hendak meruntuhkan hak-hak penduduk asal negeri ini.

Kita mesti tahu di mana sahaja ada peluang, kepada siapa pun dan di mana-mana jua pun Lee Kuan Yew dan orang-orang PETIR mahu sahaja bercakap dan mengambil kesempatan untuk dakyah partinya. Sebab itu berhati-hatilah!

